

天啓

崇禎

皇華集

二十四

皇華集卷之四十六編目

天啓六年丙寅頒 皇太子誕生詔使三

大者六季丙寅賧 皇太子薨三歲外三
皇太子薨之四十六歲目

皇華集卷之四十六

南宮夜宴

王夢尹

天末遽廬地良宵一聚星
方言須譯解郢曲許誰聽
月泛杯中白山餘檻外青
不辭同卜夜萬國喜來寧

次韻

金堞

馥馥芝蘭室輝輝奎壁星
離筵夜初設更鼓坐頻
聽髮向此時白眼從何日
青歸朝倘相憶尺素報
丁寧

李廷龜

夏樹深留月春亭迥帶星
山宜晴後見詩好夜分

聽王事心常赤交期眼各青他生不盡意臨別

更丁寧

昨夜皆春亭陪設小酌故云

別李月沙詞丈

姜曰廣

爲樂幾何日匆匆恐別離長當從此別會面未可期
驚風飄白日冉冉忽西馳豈不懷去路爲君暫棲遲
去轍難可畱棲遲空復爲歸潮奔舊壑暮鳥投故枝
物各懷其土客心無定時去去不足道念子懷秉彝
人生重道義意氣永不虧何當此良友長餘耿耿思
執手離筵前情意兩依依願言俱努力良時正在茲

次韻

李廷龜

莫樂新相知莫悲生別離人生會有別此別無前
期飈輪不可駐風駕將西馳願得一言贈爲我暫
遲遲詩如翻水成文不用意爲讀罷不能釋永懷
瓊樹枝詩畱在我袖人去來何時古人重知己意
氣出天彝此身雖或分此心寧有虧清範服人心
雅操令人思思之難可見雲樹遠依依應畱一片
石芳名長在茲

別館伴李月沙判書

王夢尹

潮捲蘇門萬籟號天風吹客渡金鰲到來文命東陬
遠歸去靈槎北斗高觀樂延陵多結契包茅王國莫

辭勞期君闕下嵩呼日把酒燕樓贈佩刀

次韻

李廷龜

吹萬徒喧衆竅號
聳看雄筆掣鯨鰲
寸莛自愧洪鍾噎
巴唱難酬白雪高
一夕河梁談笑罷
九霄星斗夢魂勞
新詩更荷臨歧贈
忽覺龍光動匣刀

不佞之行辱李月沙贈言甚富
予理嚴卒卒寂寥而已
未盡離懷復成口號

姜曰廣

去去重回首不堪別
好山望山方淚別
友復到陽關

其二

雨過高城洗碧空
龍旌冉冉動秋風
此行不爲臨淵

美自愛垂綸大海中

其三

萬里乾坤一客歸垂楊是處故依依交情惟有樽前
淚許得西風送滿衣

次韻

李廷龜

弘濟橋邊水蓬萊海上山一杯從此別何日入秦
關

亭午朱曦熾碧空密雲蔽雨靜無風怪來爽氣生
衣袖爲是冰壺暎座中

是日
熱甚

仙馭飄然信宿歸眼中幢旒盡依依傷離不獨樽

前老看取傾都詠衮衣

是日都中父老二萬餘人攀轅讚頌於道左故云

奉別正使大人台臺下

不佞忝候館下未一旬矣高文佳什厚借
獎詡榮光下逮啗感平生薰德誦義實倍
他人祖筵將開颿御莫挽明朝弘濟橋邊
卽是天上人間永分之歧路也不勝區區
兒女子之情敢以三律仰申下懷

河清千載 聖人作天啓五年太子生爲遣詞臣
頒 大誥仍教海若護雙旌威加遼薊屯邊將恩
浹溜青戍海兵何幸偏邦逢盛際忝陪賓館似登

瀛

其二

南昌雄府大江西衮衮才賢似聚奎俊采驚人瞻
玉樹高科拔萃貯金閨九天雨露琅函降萬里風
煙綵筆携一識荊州誠宿願可堪明日隔雲泥

其三

門館陪從未浹旬忽驚霄漢返飈輪聞聲已久今
先覩並世猶難况後塵清範自令人起敬別懷偏
使我傷神慙慙寄語清江老白髮相思又一春

不俊

於己酉年曾僊熊御史極峰大人令
聞清江與新建近鄉故末句寄意

奉別副使大人台臺下

玉趾之光臨敝館纔經信宿矣累荷佳章
飽挹清芬此身如在光風霽月之中矣雖
知終有此別而亦不料遄返之如是卽今
軒車載脂仙路杳然敢攄別緒仰希斤教
青箱舊學擅家聲執簡鑿坡早蜚英玉節戒途鯨
浪靜文星映塞虜氛清 皇恩不隔山河遠賤迹
仍叨僨接榮漢水楊湖陪賞地異時魂夢似前生

其二

一接高標似霧披儼然紳笏廟堂姿詩筒屢遞皆

清藻酒席頻陪若素期萬古風流文苑借百年知
遇老身私惟應惠澤畱東土沒世長瞻峴首碑

其三

神皇雄略奠吾東眷許陪臣奏額通并載四霑光

祿酒一秋重泣鼎湖弓

不佞四度奉奏朝天及庚申秋在北京連遭二聖

賓天之慟故云今逢小海無疆慶自幸窮溟未死翁天上

羣仙如夢裏高文長誦柱河公

庚申年奉使在玉河館時柱河汪老

學士求見沿途所作仍有序文故末句寄意

大平館舊有張芳洲六十韻歸途次之

王夢尹

皇靈遐邇徧玄穹四海謳歌德教通運轂有星皆拱
極廣輪無水不朝宗梯山航海譯千里端冕凝旒
肅九重前席人人才補袞後車在在兆匪熊祚綿周
曆皇圖永昌莫燕都王氣雄冲聖祥開蒼震器普
天喜見紫泥封十行頒出嚙書鳳萬里擎來仗節龍
鼓角喧闐聲沸鼎旌旗繚繞影垂虹皇華分得雙旌
寵王事慙無四牡功回憶承明依玉闕猶聞重潤
奏鏞鍾雙懸日月青天上嗣闢乾坤紫極中正直平
康歸主德雨暘寒燠亮天工聖朝自覺封章少
客館偏宜花氣冲馬入翠微山欲盡舟凌浩渺水無

窮鶯花爛熳春光麗耕鑿依倚帝治隆風動遐方
濡雨露恩流大地起疲癯停驂處處笙簫擁伏軾紛
紛車馬衝絕塞金戈褫虜魄橫天銀漢洗兵凶誰云
鰈域山川異今見雞林文物同江水光搖明月浦龍
山霞映牧丹峰都城錦帳藏春色島服繩樞見野容
柳擲鶯梭翻影綠花沾蝶粉舞流紅紗窗女喜蠶初
老沃野民歌歲屢豐僊窟塞帷忝異賞天涯仗劒破
幽踪山川仍是檀封地渾噩猶存箕子風布德隨方
皆撤部宣言特地爲提壘遐陬雨潤幽蘭秀窮谷春
回細草茸化國日長惟鼓腹樂郊風靜絕飄蓬鶯兒

笑弄門前笛逸老閒拖野外筇飽歷風霜頽 帝札
遙瞻甲第構王宮 賢王擁篲簪紳集侯館遲賓劒
履從且喜開樽來閭苑無勞問道訪崆峒數聲睨睨
啼黃鳥幾簇琅玕響碧叢高閣排雲星斗近雕梁耀
日燕泥慵瓊簷翡翠垂珠箔錦帳鮫綃繫絳絨嫋嫋
歌笙歸夜月霏霏香篆撲簾櫳綺筵屢進情偏渥玉
塵頻揮論轉崇酒泛葡萄澆旅况笛吹楊柳帶春融
交陰庭檜能消夏傲雪喬松不畏冬授簡咸推梁苑
客佩觿豈效衛邦童八條明訓追三代一介清操藐
萬鍾問俗時呼村內叟觀風但看道傍傭詩書禮樂

期經國弓矢干戈亦戒戎漠北跳梁時褭鐵海東摩
厲可標銅桑麻八道民生裕職貢丁秋庭實充雪滿
草枯堪講武春深雨細可明農同仇當念突遼豕異
地常如度塞鴻羽蓋乍傾情戀戀驪駒已駕雨濛濛
遙瞻天表辰居北近見扶桑日出東棹返十洲遊汗
漫錦旋三島影寵從探奇搜盡神僊窟寄興空餘豪
俠胸每對乘槎思漢使有懷定遠憶班公迢遙客路
風濤險游泳方舟意氣洪沙際無波時歛灩林梢有
月半朦朧孤身絕域同飛鶴回首朝陽正茂桐血氣
皆知揚化育涓埃何以答穹窿咨謀周道懷方切祖

三才集
餞離亭意更濃把袂也知分袂易持杯莫惜酒杯空
別君謾訝風帆急去騎猶嫌幃革鬆歸侍 聖皇鰲
禁裏東漸西被佐熙雍

次韻

金 湜

皇仁覆燾配高穹玉帛咸隨九譯通道接三王兼
五帝功光 聖祖與 神宗拓恢恒岱開雙闕控
扼幽燕壯九重釋褐登朝皆鸞鷟擁旄專閫盡羆
熊百年禮樂儀文盛萬里山河氣勢雄蒼籙相傳
周曆服金甌岡缺漢提封鈞陳錯落模玄象環珮
鏗鏘拜衮龍祥繞斗樞徵大電光垂華渚驗流虹

宗祊共賀綿靈祚奕業仍昭贊帝功遣使陳詩歌
駱馬揚庭舉禮擊金鐘青齊原隰驅馳際析木封
疆指顧中浮海行裝經地絡凌雲詞賦奪天工風
謠可但褰帷採霄漢方思舉翮冲造化無私機不
息飛潛得所妙難窮歡均裨海君恩遍化洽藩
維泰運隆物色幾多輸諷詠仁聲猶足起羸癯冠
裳雜襲三京路車馬轟騰四會衝列缺居前清全
埽孟槐隨後備妖凶天淵莫道尊卑隔蘭蕙終須
臭味同樓閣宵明臨積水煙嵐晝捲露危峰每於
樽俎周旋地不見崇高富貴容瑞世羽儀輝鳳彩

奪眸宮錦染猩紅叨陪珠玉知形穢瞻望門墻識
道豐江左夷吾宜並美漢朝丞相可追蹤試看浩
浩長杠筆方信洋洋大國風道與神俱心已契音
隨俗異耳如聾鑿刀斫鱸堆銀縷金碗分漿煮紫
茸已許盧敖遊汗漫悅携韓衆涉壺蓬天涯日月
違高枕物外溪山入短筇公望定知調玉燭計謨
應念奏金宮遊魂醜虜須生獻揭賞王師已影
從欲挽銀潢洗兵甲思將尺劒倚崆峒兇殘會築
鯨鯢觀疆域寧容犬豕叢聖澤汪洋流率普遐
氓聳動激疲慵東西綺陌排雲幕遠近旗亭颺錦

絨燕寢清香薰几席鰲頭秀色滿簾櫳賓閣奏樂
繁絃咽公讌傳觴法酒崇苑樹暖含佳氣嫩殿雲
晴帶瑞光融冰霜苦操蠲煩熱松竹貞姿傲大冬
鸞馭逝將廻碧落鳳簫何處引仙童由來獻納清
曹貴自是崧喬間氣鍾御衆豈惟明號令推恩要
在逮夫傭士能宿飽應趨歿民使知方可卽戎濟
物誠深昭白日憂時髮短攬青銅褒揚踰分常心
惕儼接非才謾位充逐扇惠風翔一域隨車好雨
潤三農雲泥易阻悲虫鵠萍水無期歎燕鴻地入
登萊山嵒嶮波連渤碣海冥濛衆星拱極回瞻北

旭日騰空背指東彩蜃昇霏時滅沒青鯨跋浪或
寵從笑看塵土三千界痛洗平生八九胸華使古
來皆俊傑高標誰得似吾公能令景仰英華著爲
所包容噐宇洪天闕五雲橫縹緲屋樑殘月照朦
朧衣冠久假麒麟植山水誰調霹靂桐德在豐碑
長炳煥名將華嶽並穹窿臨分屬意言猶在叙別
畱詩墨尚濃魚鴈雖多書未達夢魂纔去覺還空
衰顏帶病丹全謝愁鬢逢秋素更鬆歸佐聖明
圖至治願將糠粃鑄時雍

李廷龜

煌煌日月揭高穹一氣昭蘇萬域通軌度幾衡齊
舜政本支磐石盛周宗天人叶應三階泰山海梯
航九譯重濟濟簪紳羅象緯桓桓仗衛列羆熊豈
惟盛代規模遠自是神謨駕馭雄卉服羶裘歸版
籍炎風朔雪入提封丹山旭日儀祥鳳大澤雲雷
起伏龍一夜瑤光纔貫月三宮瑞氣已騰虹謳歌
允屬歸依地調護何煩羽翼功禮重郊禋昭簡冊
頌騰星海播歌鐘事光五典三墳上化本關雎麟
趾中率土歡呼均遠邇盈庭蹈舞造臣工神扶奕
業重熙洽天縱英姿自幼冲燕翼百年基有永綿

區一視慶無窮偏邦亦與頒宣列 聖渥還蒙錫
賚隆遼左威加安反側山東 詔下泣羸瘠文星
暎塞旄頭落壯士迎郊劒氣衝可但藩維罩布慶
佇看巢窟迅除凶霜臺玉署芳猷重霽月冰壺雅
操同江右精英鍾瀨水寧南淑氣挺恒峰當筵逸
發瞻風裁將命周旋見禮容賜帶橫腰藍玉潤宮
袍纈眼越羅紅馳驅原隰身猶健閱歷艱危道益
豐僻壤不期逢盛典老身何幸躡仙踪聲名山斗
聞高義道學河汾聽下風德氣薰人心似醉華言
憑譯耳猶聾清談霏處瓊瑤屑彩筆揮來紫翠茸

應有宿緣相感結却驚佳會似萍蓬樓高山雨

樓名

頻聯席亭豁皆春

亭名

幾策筇舊迹時尋太平館靈

襟遙寄廣寒宮登臨氣槩三韓隘陶寫風煙萬象
從王晉初疑降綏嶺廣成還似住崆峒笙歌縹緲
瑤池宴冠蓋聯翩玉樹叢白羽乍搖魂已爽烏紗
欲整醉還慵香凝燕寢森雕戟風颺旗亭簇綵絨
雨後微涼生殿閣晚來空翠入窻櫳登門自詫榮
光湔下榻全忘位望崇一字過褒知契合片言相
許覺神融覩天快若初披霧就日真如可愛冬每
誦篇章應口沫自憐衰朽已頭童陽春遺響誰傳

郢流水知音幸遇鍾方信使華誠俊乂故將恩德
及耕傭精衷益激尊中夏車甲寧稽賦小戎指日
燕然將勒石從今渤海可標銅天開紫塞妖氛淨
日轉青丘喜氣充諸將傾河洗兵甲齊民擊壤樂
桑農高標莫挽冲霄鶴勝迹空畱踏雪鴻衰草長
亭秋漠漠亂山孤驛雨濛濛歸帆碣石重溟外仙
路扶桑萬國東鰲背青山雲鬣鬣鯨邊白浪雪龍
從冥床自仗神明力外物何曾芥蒂胸達去如斯
程叔子恬然自在呂端公前賢偉量應追武斷港
涓流敢較洪峴首遺芬碑突兀屋樑殘夢月朧朧

來時碧葉迷汀樹去日金風落井桐六月鵬程窮
汗漫五雲龍闕上穹窿訐謨更掌絲綸密獻納重
承雨露濃聚散有期分手易歡娛難再轉頭空牢
愁可耐樽前苦衰鬢空添鏡裏鬆無限別懷重寄
語遠人加額望時雍

題寶翰承恩錄後

王夢尹

巍巍高祖烈赫赫大明圖上帝增其廓羣雄振
若枯兩儀分混沌一統直須臾威德遐荒鬯蠻夷大
賂輸風霆飛赤鳳冠帶受玄菟舞蹈權生肅懷柔
聖主娛天光縈北闕宸翰下東隅允陋十行漢直

追二典虞鯁生能感激珥筆載陳敷今上列干羽
微臣度舳艫開函驚寶蹟摺笏想瑤珎紙上祥雲朶
毫端明月珠三辰歸結構萬象入規模渾渾含元氣
洋洋頌聖謨儀刑儼陟降法則較鎗銖忠義千秋
在皇恩奕世俱

燕慕華館紀別

皇華數日漢江湄未忍輕分賦別離朝雨一聲歌進
酒暮雲千里繫相思君持雅志藩龍塞我已歸心遶
鳳池折柳不須勞悵望由來聚散總如斯

次韻

金 塗

仙輶還指海西湄遠送終須有一離江左名高徵
盛業峴山碑在寄追思帆檣影度馮夷窟環珮聲
聯太液池黃鵠遙瞻霄漢上蓬蒿空自歎鸞斯

碧蹄別右議政諸陪臣

王夢尹

海邦風雅藹孤騫抗手離筵鼙鼓喧短棹余歸朝
帝闕長裾君去曳王門斗間氣紫雙龍在江上風
高萬馬奔玉帛東藩侯度謹南山早祝紫薇垣

次韻

申欽

祥輝千仞鳳騰騫翮羽堪朝百族喧擎出芝綸頒
海國收將颺馭返天門聲名詮載貞珉煥達路盆

薌萬姓奔半夜福星高照耀佇聞簪笏上台垣
寄別碧蹄陪宴議政等列丈

姜曰廣

流蟬細細咽垂楊知己天涯祖道傍萬歲聲隨龍節
重千山日送馬蹄忙扶餘半是雲爲樹瀚海真成水
一方此別願言俱努力胡衰頃已兆天亡

次韻

申欽

憶向離亭賦折楊幾回惆悵路歧傍歸輶已與仙
飈遠別意空隨落日忙賸馥襲人碑在口清標如
水玉成方訐謨此去籌前箸沙塞塵消虜運亡

玉溜泉

姜曰廣

蒼崖開洞壑奔湍戛琳球濺作晴空雨清生夏日秋
含風聲更靜咽石滴還畱美爾涓涓意終歸大海流

次韻

金堙

松間生竽籟泉鳴碎磬球傾崖陰易夕深洞爽如
秋勝地何常有歸輶且少畱臨風橫鐵笛聲斷碧
雲流

小泉有盤松數株予低徊其下幾不能去樂而
詠之

姜曰廣

離奇天挺質鬱鬱宛龍蛇擎重枝彌勁盤旋節愈繁
翠光團鶴夢石齒裂雲根殷社還相友秦封定耻言

遊絲牽客袂偃蓋護輜軒拳曲千秋意因深雨露恩

次韻

金 湜

蒼松飽霜雪老幹自蜿蜒爲處層崖迥能超衆木
繁蔭泉低瘦葉抱石露危根想像鸞曾宿依稀鶴
有言借涼移錦席終夕駐朱軒畱作甘棠樹無忘
沒世恩

過青石山

二山環抱略似太極圖景最奇絕

王夢尹

絕巘凌霄漢空青點太微幽泉流疊嶂削壁匝重圍
揖客雙巖翠裁雲萬樹飛開尊望白岳登眺攬晴暉

次韻

金 湜

客路紆松岳高旂轉翠微峰尖玉簪聳峽束石屏
圍逝水元無盡幽禽不妄飛催鞭脫重險山外已
斜暉

回日同姜年丈金判書遊葱秀山

是日宿
此山下

王夢尹

一派嵐光合山孤翠欲流泉飛茗煮玉鳥報酒添籌
賓主歡投轄往還共勝遊地靈知愛客欲去又爲留

次韻

金 堞

歸程還勝賞歇馬復溪流熱肺猶堪濯飛觥莫放
籌閒雲非俗物小雨助清遊謝眺驚人語惟應去

後畱

書似北渚金太宰郢正

王夢尹

恩光燁燁下層氛異域將迎幸有君
鰲背獨吟三島月馬蹄同破萬山雲
佩遺雷煥青萍劍詩滿羊欣白練裙
千古此情應不朽三生共結一氤氲

次韻

金 湜

晚登江閣滌炎氛座上清香接令君
彩鷁暝回滄海雨皂鵬遙沒大荒雲
但將傑句酬佳景終勝羣兒醉絳裙
好會不妨仍卜夜滿樽醺醪正氤氲
抵平壤寄別李月沙契丈

姜曰廣

海鶴高姿映綺筵更看文采雋翩翩雄名一代齊華
岳大業千秋起謫仙自昔南州人作客到今東國道
存賢別君不盡倦懷意歸把新詩仔細傳

次韻

李廷龜

傾盖無何已別筵忽看雙鳳遠聯翩自憐窮海同
羈羽何路瑤臺問列仙父老徒勤衮衣詠訐謨方
佇侍臣賢交期不隔滄溟闊夜夜精神夢裏傳

又用前韻兼奉極峰老先生

極峰熊老先生十八年前奉詔來臨也
不佞忝爲儉伴最蒙知遇厥後朝京屢荷

款接間者闊焉亦十餘年矣清芬雅操非
但不佞欽服東土之人至今稱誦不能忘
聞清江與新建近鄉故敢寓寸情於詩中
卽見老先生歸把新詩仔細傳之句千里
肝膽悅如共對一堂惶恐不敢附書於行
軒敢以一律兼寄下懷

慣向河橋辦餞筵九霄歸馭又翩翩極峰雅望烏

臺石

中朝人贊極峰公
有烏臺介石丹壑清冰之語故云

太史清芬玉署仙

海外十年重儼接江西一代盛才賢
新離舊別無窮意千里郵筒可盡傳

歸抵安州金北渚太宰畱飲百祥樓卽席賦此
爲謝
姜曰廣

高樓四望紫煙清萬里煙光萬里明山讓平原邀落
照河分別澗抱孤城臨風不禁狂歌態對酒寧堪惜
別情返轍知君思此日愁看天際片帆行

次韻

金堃

雨餘樓閣十分清淡淡長江檻外明萍水逢迎真
一夢山河襟帶此高城前途已少歡娛日此夜難
禁去住情遙想海門分手後歸舟唯有月同行
題北渚金太宰洗心軒
王夢尹

螺髻當軒出笏牙極目飄倒翻江練影低映河繩搖
虛白座中滿孤空天外招殊恩饒勝地不爲遠塵囂

鐵山筵次奉別金北渚太宰丈

姜曰廣

今日不盡醉含情待何年中量豈獨淺強飲不能咽
念我金石交中道忽棄捐歡愛從茲絕孤遊去自憐
嘗笑兒女泣悲來仍復然憶君相逢日兩意何翩翩
情隨周旋積義以聲氣聯義重自難別矧此去不還
去去日已遠相望各一天雲山不可極何以解懸懸
惟與中原士推君東國賢丈夫志四海萬里猶比肩

次韻

金 堃

此別已銷魂相悲復幾年華筵對綺俎欲餐未下
咽亮願勿復道有懷誰能捐送行顧有適撫已私
自憐竭來海上山雲物何蒼然逝水自滔滔征鳥
亦翩翩見此益無慘別袂動牽聯豈伊兒女戀此
去良難還澄明霽後月爽朗涼風天清標邈難攀
空仰高名懸從知千里制本自由一賢殷勤謝知
已寸心期永肩

宴蛇浦奉別金大宰尹觀察二丈 姜曰廣

玉節西馳望 帝畿垂楊道左故依依不堪遠浦張
筵別况有風花帶葉飛落日高臺君立望浮雲大海

我飄歸茫茫一去三千里相憶惟看明月輝

次韻

金堊

漾森鯨波連日畿海山煙景望依依停歌罷舞客
將起打鼓發船帆欲飛白雲千里帝鄉遠黃鵠
一去何時歸天涯顏色有明月屋樑夜夜畱餘輝

平安道觀察使尹暄

要荒莫道遠皇畿日月餘光荷近依丹詔東來
雙鳳覩玉京西指五雲飛翰林物色畱詩在越橐
行裝泛海歸別後三秋天上桂祗應流影認清輝
蛇浦畱別伴送使金判書尹觀察王夢尹

我后洽文教星軺屈海洋海洋有令人佩玉來鏘
鏘接武相朝夕贈我瓊瑤章人生期意氣何必不殊
万鯨鯢隔衣帶王師出阮疆非敢私好慕念與子
同裳鼓枻自茲去海濤浩以長勗哉各努力畏此友
朋良

其二

靈根不櫟植翮羽無羣翔丈夫四海志那復別離傷
朝游漢江滸暮泊天風洋豈不太匆遽王事迫衷
腸酌酒與君別島嶼何茫茫掛帆去不顧仗劒慨以
慷王虺簸狂飈郊壘紛且長策足樹高勲毋失良朋

望

次韻

金堃

祖席臨大海大海何茫洋
繫纜贈我詩金玉鳴鏗
鏘翩翩九霄翮五彩成
文章和聲隨祥風銜詔來
東方六合且一家莫道殊
封疆痛茲鱗介倫左袵
毀冠裳忠膽鬱輪囷吐氣
晴虹長此心質神明敢
忘規箴良

鷦鷯本一枝鷺鶴元高翔
此去幾時返此別令我
傷中國有聖人波浪息
海洋胡爲心不寧沉憂
結中腸蟻屯尚未平遼
左塵茫茫對酒不能喫
劒

歌聲慨慷臨分和高韻語短意何長各思贈與處
勉旃副所望

尹暄

皇明啓熙運文物何洋洋玉京集羣仙水蒼韻鏗
鏘霞車引羽蓋雲漢分天章湛恩布汪濊萬國歸
職方朝日生鷁首路入扶桑疆風飄煙霧樂秋氣
芙蓉裳回帆不少畱大海粘天長歸時鳴大雅側
竚歌明良

黃鵠萬里舉丹鳳千仞翔可望不可攀我心自悲
傷颿風一棹遠碧海流洋洋所貴是姱節戀戀懷

中腸浪跡阻雲泥精神接混茫肝膽非楚越離別
成慨慷乃知君子德入人深且長去去行李安朝
朝雲海望

俚言書似 賢王老殿下博笑 姜曰廣

漢德亨隆日正中歡騰瀚海共春融九疇八約傳休
遠後鳴先雞應運雄紫氣北來 天子詔洪濤東湧
大王風臨軒俯問三韓事爲道心懸捧日忠

畱別三都監

王夢尹

鶴駕今朝合龍旌明日分花輦畱去客鳥語怨離羣
不盡綢繆意難通嗣續文心期同拱極遠近一天雲

寄贈弘文館李道章鄭德餘銓部郎鄭子容丈

姜曰廣

涼風響高樹危葉半銷落豈謂驚秋時歸舟去飄泊
檢視贈言章珠璣富囊橐後來出愈奇三百音復作
誰能爲此音毋乃茲宿學惜哉追隨久未遑致酬酢
月沙有鳳雛五色光融瀾德餘學動天藜照校書閣
子容王裴選冰鑑玉尺度宣質拔行高曜文摘藻錯
愛而不復見搔首望寥廓人生無常聚所貴襟期託
傾盖亦知己浹旬義不薄

寄都監鄭司業

王夢尹

絳帳當年說鄭玄
箕疇今見鰈邦賢
圖書東壁欣瞻
斗屏翰中華競戴天
把臂蓬壺仙侶集
歸帆瀛海客
心懸相思不盡相逢意
短句遙憑塞鴈旋

寄都監鄭郎中

猶記江干始識荆
無端雲樹映離旌
一時夾袋銓衡
重五色奚囊風雨驚
回首海天仙路遠
縈心梁月故
人情期君別後無他事
爲弼王藩洗漠兵

寄都監李翰林

君家喬梓迥仙才
世業文章走電雷
臣節海東延帶
礪皇恩天上遍塵埃
裁詩六月霏春雪
好客連宵

泛玉杯祇令有懷深漢水不知何處折江梅

奉別正使大人

金 湜

盛代稱多士明公冠一時冲融標世業灑落仰風
姿史閣波濤筆鑾坡訓誥詞名賢重出處吾道卜
興衰甲觀呈新慶銅龍舉縉儀芝綸出三殿奎彩
照東陞軒蓋初相迓幘幪得屢窺周旋寧免墜恐
懼若乘危月榭華筵敞煙江彩舫移淹畱十日飲
敏捷百篇詩嫖母難藏醜驚蹄奈易疲歡娛元一
夢聚散亦前期志厲冰霜苦民懷德澤私甘棠召
伯樹片石峴山碑豈盡平生慕惟添去後思帆檣

凌渤澥旌節鎮蛟螭邊地瘡痍在遼天鼓角悲妖
氛終迅掃雜種定無遺匡濟公能任台衡位未遲
臨分更屬意凡百慎施爲

奉別副使大人

震索高禰慶雷騰萬國歡文星辭北極紫誥降東
韓苦節存冰蘂丰儀覩鳳鸞汾陰宗道學江左世
衣冠得意風雲會馳聲諫諍官幸叨賓館候偏荷
禮容寬綴席初披霧升堂更襲蘭詞場推準的筆
海富波瀾旌節三京遍樓臺六月寒御風遊汗漫
窮日坐團欒勝踐頻攀袂歸程倏戒鞍亦知終莫

住且復暫相看萍水前緣在天淵後會難詩傳名
不廢碑在德無刊仙馭丹青迥靈槎碧海漫妖氛
未全息塞土幾時安甲卒猶乘障將軍舊築壇舍
生皆聖澤滅賊擬朝餐濟世須長策封關要一
丸離懷與時事嗚咽淚空彈

奉別正使大人 弘文館副應教鄭百昌

冰蘂清標錦繡腸官袍纈眼帶鑪香 詔從北闕
星辰近槎泛東溟島嶼長巴曲自難追郢調野渠
寧許溯天潢雲輶一去重霄隔紫氣遙瞻 帝座
傍

其二

翩翩雙鳳下層穹千仞爭看羽翮同斗北聲名推
地望江西詞賦奪天工芝函遠布嵩呼遍錦纜催
歸海侵空獨有太虛樓上月別來畱照畫簷東

奉別副使大人

奕葉洪休屬游雷皇華掄使得全才十行詔自
丹霄降萬里槎從碧海回腥霧晝晴瞻碣石靄雲
宵映指蓬萊應知河漢窮源日一點文星接上台

其二

文采中朝第一豪紫泥擎出五雲高微蹤自幸陪

龍節下土何曾覩鳳毛黃絹爭看新勒石碧紗長
護舊揮毫驪駒唱斷仙舟遠極目滄溟萬里濤

奉別正使大人

吏曹正郎鄭弘溟

使華旌節儼東臨鸞鶴風姿雪月襟美價自超三
獻壁清名不愧四知金波恬渤解迴船日雲接蓬
萊望闕心想得歸朝仍倬直玉堂依舊寶書森

其二

將迎門館乏先容莊誦緇衣意味濃千里道途慙
附驥一堂筵席幸登龍南昌人傑誰爭長北地詞
華可並蹤怙悵德音從此隔目憐身世限箕封

奉別副使大人

自是青蒲獻納臣爲宣
皇命渡滄津蘭芳襲座
長畱馥玉樹臨風迥出塵
海外山川渾入眼橐中
詩卷只隨身惟應采得風
謠去敷奏分明徹紫宸

其二

一日鸞書降九霄東來紫氣護星輶
文章已覩成家妙禮數俄驚置榻邀
塵界肯教淹玉節海門無那送蘭橈
休言萬里從今夕夢越鯨濤不覺遙

奉別正使大人

弘文館修撰李昭漢

虹流新慶萬方同

帝遣詞臣下海東
暫向箕封

頒大誥却催星駕返層穹神明共護張槎穩行李
爭看越橐空多少都民遮道處百年瞻仰峴碑豐

其二

獨步花磚第一人雍容風範映簪紳揚名少日登
龍榜染翰多年草鳳綸玉節暫辭天北極琅函遙
降海東濱明朝別後仙凡隔此去清都更幾塵

其三

將迎千里敢辭勞猥荷明公一字褒已見絲綸宣
海域久知忠信任風濤揚帆直渡蓬萊近倚劒豪
吟碣石高好趁新秋還日下五雲多處拜龍袍

大人

還到平壤答家親揭有獎詔不佞之語
故敢於末篇第二句略伸不敢當之意

奉別副使大人

鸞臺聲望廟堂姿
珥筆丹墀幾進規
雲漢早伸鴻鵠志
海邦先覩鳳凰儀
孤槎更向來時路
片石空畱去後思
自恨塵蹤淹下界
重逢難卜此生期

其二

冰蘖清名萬口傳
乍頒丹詔卽催還
詩篇剩得江山助
行役頻驚節序遷
遼塞柝聲憑劒外
岱宗秋色掛帆前
懸知繡斧趨朝日
恩獎親承帝座邊

其三

微踪何幸躡名流得御初從廣遠樓霏屑清談揮
玉麈驚人健筆動銀鈎臨歧可耐分離遽下榻偏
蒙禮數優別後多情天上月也應來照海東陬

別贈張司譯禮忠

姜曰廣

誰謂言語淺不如人意深賴君三寸舌能通彼此心
溫文布密致清氣溢冲襟挺轡隨征軸左右如相尋
樂我登眺時旨酒手持斟問疾彌懃懃寬譬備好音
多情既可愛嫺禮亦所欽倏忽於役歸別爾在海陰
親好從茲絕涕淚不能禁愧無雜佩贈詩以代兼金
別贈朴仁厚崔尚立林大貞三司譯

中原遊客去匆匆異國山川望不窮磨盡寶刀橫斷
海水流那復用西東

其二

儒雅風流盡雋英慇懃是處有逢迎茫茫海水深如
許不及三君送我情

與司譯李膺朴璇

王夢尹

九天傳鳳詔杖策漢江潯不愧蘇卿節何須陸賈
金觀風懷列國候月得知音千里情何限傳宣賴慧
心

與譯官鄭夢參玄頊

跋涉千餘里殷勤迂鳳書勞君遠負弩喜我近脂車
晤對三山外趨蹌一月餘臨歧望江水惜別漫躊躇

皇華集卷之四十六

皇華集卷之四十六

皇華集卷之四十七編目

天啓六年丙寅頒 皇太子誕生詔使四

皇華集

皇華集卷之六 為大司馬趙公

上書

皇華集卷之四十七

祭海神文

惟神騰精乘景捍患禦灾播靈之日久矣至於航海
獲濟者咸云目覩尊神金容朱服現身垂慈如取自
魚腹登之彼岸人書所識今昔一口盖自有神明標
聖未見若斯之炳烈者也肆今天子冊以元妃下
民呼爲衆母尊親之至亦固其宜職等以今皇帝
之六年噉命朝鮮取道東海命下以來朝紳見者
罔不侈頌明神動色戒勉曰惟天祀實靈子行不可
不虔祀之夫以尊神之威靈赫濯功德巍隆某等卽

偶過神祠猶當肅容禮拜矧浮海之役將徼福於左
右其敢不必誠必敬禱祀而求吾聞四海之中惟東
海稱險最其風剛其水勁其島嶼爲蛟龍之窟穴精
物之都居其盲風毒霧駭浪奔濤澗厖無節至於幕
日粘天嘯神號鬼邇方開道間集人踪亦不過出防
之水卒與夫走利之販夫往往須慮戰於桔槔長年
牀爲涓蜀是皆百往一返猶出萬死一生以故去則
舉家泣訣談亦神肉飛騰某等雖孱弱一書質羸科
雉然攝衣登舟慷慨無恐豈有他哉實恃 聖天子
之明命及尊神之呵護在今 皇帝以盛德新卽天

子位懷柔百神靡愛玉帛是以往者河伯効靈凝碧
萬頃夫黃河千年一清尚不難爲聖人表瑞以海視
河位號爲尊其不宜獨乏媚茲明矣惟尊神明諭海
若俾其有以自處如或使者不虔不檢貽羞簡書明
神所鑒得以罰之若猶未也明命煌煌天威咫尺百
爾諸神孰敢戲渝不震不驚以引以翼匪惟尊神之
德似亦尊神之職且今日此行中外共見職等旣數
禱祀而求則尊神僅爲耳目所屬尊神其亦自爲光
大厥聞計慎毋或以使者薄德至傷神之靈少借慈
航用成利涉來格來享神其聽之南州姜曰廣具草

漢江船遊圖記

今 皇帝御宇之五年以 皇子誕生布德惠于天下尹適承引駕之役 帝東顧曰吁白岳漢江沐浴王化久矣汝其副館臣往海邦昭我令德兼視遼衆之在朝鮮者越明年始抵 王都禮既游于漢江修故事也出郭里許岡陵層複林木鬱蔥迤邐數里乃抵江濱憑高四望夙所聞漢江樓者兵燹之餘杳乎不可得覩矣惟是遠岫近峰平堤危岸爭秀競爽依然一山川勝槩也登眺多懷慷慨入坐而 王遣諸陪臣至矣地以人奇景與心會喜不自禁遂復快然

登舟廻翔萬頃中珠履繽紛杯盤雜錯清歌與白雲
竝流舞袖偕水光交亂譯旣頻而勞不憚語未傳而
神已解惟有相視而笑耳旣而流景微曛皓魄乍明
遙望東山如瑤臺如銀闕如美人之臨粧而飛霓彩
鷁蕩漾于波光上下間真如泛碧海而槎天漢不亦
樂哉噫毛師露宿于鐵山遼衆腹枵于鮮島 天子
拊髀而嘆司農仰屋而籌予乃撫時戀景騁目快心
樂予之樂耶樂人之樂耶雖然予使臣也假令遄歸
言邁白岳漢江間父老子弟不獲望見使者之顏色
而懷想 天子之明德不滋予懼乎于是主賓歡甚

執觥更酌載月而歸于南宮時天啓六年季夏賜進士第徵仕郎工科給事中賜正一品服兼閱海外兵馬屯田等務廕遙王夢尹撰

恩波亭記

漢江之湄金太宰賜地在焉構亭其上屬予題且記之以彰 王賜予旣題之恩波亭矣或曰美哉 王之愛賢臣也恤及其私也太宰之樂也不忘其君也予曰且子亦知夫 王錫是亭之深意乎夫匈奴未滅無以家爲太宰素有大志 王之所鑒知也園林之樂不過流連光景者之爲此或太宰他日功成拂

衣時事耳而今汲汲爲之母乃太早計乎且王以
用錫者何也昔賢有言山水以形媚道政與人神情
相關故高深之地君子樂之以其能泰人情神豁人
思慮故耳又曰登高而望遠其中必有慨然者維漢
江奇秀甲東國而茲亭適據其勝太宰自公退食駕
言出遊登斯亭也北望神京五雲縹緲必誦韓侯佐
辟之詩而思續其遺烈其西卽虜酋之嘯聚穴也奔
蹄勁角耽視爾圍又能懈直抵黃龍之志乎亭高而
安深而明江流綰帶其下雄濤噴湧細縠淪漣加以
風煙披薄山色波光共相出沒變現萬態足以發引

人智性且夫虜酋者剽悍蠡勃可以智取而不可以
力爭也太宰籌之熟矣以太宰決策其上高視深惟
悠然會心卽笑談杯酒而虜固已在目中矣慧勤之
論歐公也曰江山之勝雖莫適爲主而奇麗秀杰之
氣常爲能文者用歐公用以奇其文太宰用以奇其
策意寧有異耶淝水之戰安石每命駕遊山其云措
置已定盖冲悠妙湛得之屬引清發者爲多而或者
徒謂其矯情鎮物則亦窺之淺也太宰之受地不辭
盖已深喻王意謀成意得時請太宰以酒澆之曰
恩波亭勸汝一杯酒吾以汝基麟閣勲矣夫一亭之

作似無足書而其君臣一體相愛相勗之盛於是乎
寓則誠不可以不書也賜進士第欽差正使翰林院
編修纂修兩朝實錄編纂六曹章奏經筵展書官教
內書堂欽賜正一品服色奉旨閱視海外兵馬等務
南州姜曰廣拜撰

李月沙詩序

予以今 皇帝之六年 命朝鮮未旬日復以他
命行獨館伴李君周旋差久一日月沙手詩一帙屬
余序之余既卒業作而嘆曰美哉彬彬乎我 國家
之文治於斯爲盛矣昔人有言聲詩汙隆關乎世運

豈不然哉詩三百篇非聖臣名佐之筆卽田畯紅女
之詞大以昭其功德微以寫夫性情初未嘗抽繪章
句臨摹繩墨思欲爭千秋於藝苑也然而質契神明
體符造化後之才人詞客鏤心刻腎曾不得窺其堂
奧焉揆厥所由時則大和元氣盎溢在三代宇宙間
故也惟我國家號稱極治文德之矢於今二百餘
年沕濶曼美郁郁乎煥哉真與唐虞三代比烈矣風
美所扇人文鬱流雲蒸霞變說者謂詩道極衰於宋
元而大備於昭代非虛語也東國沐浴文化比于時
夏元氣之所鼓盪故其學士大夫率能振和平之響

以鳴一代之休而李君以家學淵源素稱此中名宿
其大業彬彬見推中朝宗匠不亦宜乎隨遇臻變獨
造真境汪先生斯爲不佞矣且夫詩道豈易言哉胸
情直舉多任流移則氣格不振法律嚴持好作矜莊
則風趣頓傷是以兩家各以所長交相爲譏卒亦不
相爲用何人鮮備善亦元氣旣漓天實生才有至有
不至也宗自然之說者哆口關關睢鳩出於何典得
毋受人之形復求人道於空桑乎然衣冠土木而卽
具然命以爲人亦誠有所不可何則以其君形者不
存焉耳此則倣古之過也原其所指宗以究其所踵

受兩家疵累斯可得而論也夫惟有溫柔敦厚之音而無卑靡纖促之習難矣哉詩三百篇徃徃可歌可詠所以爲盛世之元音也若李君者庶幾近之矣詩曰鳳凰鳴矣于彼高岡言瑞應也鳳凰鏘鏘之鳴中律中呂誰爲爲之感于其氣然耳元氣所召有物來相聲歌之發不求工而自工所謂作者不自知其所至而工焉者顧失之乎李君于是乎能鳳鳴矣夫陳詩達俗正使臣之職也予持是編歸將藉手以獻明庭登諸紀載用昭我國家之文治騰衍海外者如此嗚呼豈不盛哉賜進士第欽差正使翰林院編修

起居註經筵展書官纂修兩朝實錄編纂六曹章奏
教內書堂欽賜正一品服色兼閱視海外兵馬等務
南州姜曰廣拜撰

書權氏寶翰承恩錄後

予行至朝鮮訪其俗延見其人文大較雍容都雅云
夫朝鮮亦猶行箕子之道也吾夫子浮海居夷之嘆
其在斯乎其在斯乎他日嘗讀金史予甚惑焉金人
謂宋幾不擇音有我直奴視之語高麗豈其負之耶
何以至此金酋之桀慢無人禮盖不自今日始哉我
國家之待朝鮮抑何厚也夫喜起之賡卷阿之遂卽

在唐虞成周亦侈稱千秋盛事權氏一海壤鯁臣耳
我高皇帝至不難引而進之使獲附麗於其盛鳴
呼恩禮亦極矣榮幸者豈獨權氏耶倭爲封豕長蛇
綸音中深致意焉關白之難聖天子早明見百世
後矣三韓分土越在遐荒度外置之斯度外置之已
耳乃聖祖用未雨之謀告戒於先神宗取旣屋
之社扶全於後可不謂深仁厚澤哉朝鮮之報禮忠
謹不衰有以也夫賜進士第欽差正使翰林院編修
起居註經筵展書官纂修兩朝實錄編纂六曹章奏
教內書堂欽賜正一品服色兼閱視海外兵馬等務

南州姜曰廣拜手謹書

予至開城夜見光氣燭天嘆喟曰此何祥也
詰朝得覲 聖祖宸章始知其故然持是卷
出示似少草草謂宜襲以重錦告廟珍藏比
於天球大貝凡有啣命者至禮成後告以擇
吉盛衣冠焚香拜之一如謁孔廟儀然後共
相展讀更繹思其義乃爲無負 聖謨洋洋
耳姜曰廣又書

國王前揭帖

不佞輩才能虛薄奉使無狀乃辱 老殿下禮儀游

錫存問相尋明德高深卽岳山漢水不足爲喻矣但
先時銜命者凡以大禮旣成卽爲王事已竣而不
佞輩復奉有閱視兵馬之旨宿命於身不遑啓處人
臣之義也昨者慶詔一宣卽欲奉啓伏覩老殿下
玄風暢乎德音懇情發乎篤義如坐人奉陽中飲之
醇酒是以躡蹠躊躇未忍告別厥後揆稽分誼萬難
延緩然以台命之辱猶爲改期此亦足明不佞肅
將之苦心矣詩曰有客宿宿有客信信不佞之來信
宿已過且古人有以傾盖之歡結千秋之契者精神
映徹豈以久暫爲厚薄哉今遼民寄生貴邦奄奄

待斃如赤子將井宛轉井中呼號求救而身在井上者乃從容緩步以行尚得謂之有人心者乎夫救人一命勝造七級浮圖不佞早獲報命聖明必速下處分所救者或當不止一命耳不然老殿下真懇之情雖石人猶將爲動台命見辱至再至三矣豈愚執之難破遂至此也伏乞老殿下俯垂睿襟少鑒鄙志使不佞輩旋轅遄發上不獲罪於聖明下不獲罪於百姓則玉成大德猶當與雅情并佩戴矣區區鄙忱恐傳述不能悉達故敢以啓瀆統祈照鑒不宣侍生姜曰廣王夢尹再拜

又

以老殿下之忠恪 聖明也故推而及於下執事
曲降隆慈仁深日積矣但不肖之嚙命也旣無延譽
之美猶庶幾砥鐸之思徒以老殿下珍貺俯具篤
倦懇又賜降自尊未敢遽冒不恭之迹取戾左右是
以間有祇承盖亦感愧交積適者之賜抑何更出崇
弘一聞鼎命精駭思越遂至莫知啓處稽之聘志盖
以幣厚財侈爲防故不肖所藉手獻者具不腆之將
也瓊琚下報老殿下愛人固無自己但寵溢踰涯
等之鰲戴區區虛薄分實難勝古人云不惟其物惟

其意物有儕量意豈有窮哉且聞先賢之使遠藩也
交際悉受盖以安遠爲今 貴國之事 天朝誼篤
一家卽不肖自奉教以來竊見 老殿下推置款誠
溢于言表已藹然一體之義然則不肖敢告硜硜者
非獨以安愚分盖亦親愛之微誠也伏乞俯賜照宥
少遂愚硜則曲成大德直沒世嚙結矣臨啓不勝惶
恐侍生姜曰廣再拜

又

惟 老殿下蘊珪璋以成性藉蘭蕙而爲襟不佞廣
自披覲以來仰見念切 君父動中禮儀旣揚善氣

之休亦徹黃中之理目擊道存神明已接加以惠問
時勤德音欵佈甚矣其美好而宣通也雖詩誦有斐
何以加焉固宜萬庶宅心羣駿效足天篤康侯以佐
明聖豈偶然哉光儀臨遠翹企彌殷竊自思念以三
生之奇緣辱千秋之高誼顧此一別已矣離合之間
寧獨感慨係之卽交魂通夢亦自徒然持節西還惟
有奉揚明德少解苑悰耳方今虜氛未靖假息游魂
尚思狝奔豕突三韓僅隔帶水肆毒便爲剥膚昔在
有周韓侯錫命之詞曰幹不庭方以佐戎辟此則
老殿下今日之事而忠於天朝之職分也願老

殿下少抑至懷勉建大業俾顯揚令譽光大有加蓋
王侯之孝原與士庶不同要當修其大者耳俾送使
局度端凝才猷淹綜真東國夷吾邦有斯賢足耀四
遠旣承簡任自所鑒知道契冥固必並受王明之福
館伴及議政諸臣所見各道觀察畱守具明體適用
彬彬質有其文三韓得人於斯爲盛抑風雲玄感理
自不爽矣下至司譯四官亦皆溫文謹度罔墜逢迎
而張譯猶稱解事予曰有奔走其在斯乎修大厦者
不厭良材之積統祈惠顧之極知晝不秉燭日有餘
光然送抱情真竊附贈言以備葑菲之採輶軒一過

咨詢未能徒以 貴國士民被服雅化知重朝廷因
而推及使者若夫識之不忘亦何德堪此昨據流傳
實深慙悚夫洪鍾在御斯揚聲之道今瓦缶未擊而
發響震煌豈不大可怪異也哉且何以風示有位爲
民牧勸也伏乞 老殿下寢此湔美以還直道旅次
以來行李無乏宴享多儀德隨日積感亦同之矣至
於拜貺之迹多冒不恭統恃 玄慈能照形外嗚呼
流水不窮浮雲自遠碧蹄一別瞻仰何時臨楮勞懷
潛然出涕外小詩書扇博笑待生姜曰廣再拜

又

從古自中華而外雅稱文獻無有如 貴邦之特出
等夷者恭事 天朝亦無有如 貴邦之終始不渝
者則 貴邦之視胡虜奚啻人類之視犬馬芝蘭之
異糞壤哉不佞奉 命而東跋涉千里 貴邦人物
之靈秀山川之形勢居然在目中矣雖倭居東南虜
鄰西北而 貴邦撻伐或未遑固圉則有餘不足患
也惟是詰戎兵肅行伍練精銳優謀勇嚴偵探無事
則自衛以張國威俟天兵西來 賢王提一旅渡鴨
綠耀兵黃龍五嶺間覆虜之巢破虜之卵建不朽之
勲垂芳竹帛此萬世之奇也惟 賢王畱意過承高

誼區區寒暄語不敢爲 賢王道也臨緘金伴送來
致 賢王意遠體不佞軫念遼民而立刻發栗真時
雨之惠也感激何可勝言不宣侍生王夢尹再拜

與伴送使書

回到平壤見箕城士民立碑頌德送此帖以止之

方今 聖明在上禔福中外不佞奉使無狀無能宣
播萬一日夜怵怵焉以負此簡書爲愧東國之人不
以爲不肖反唇而誅之爲幸已多及見緣途百姓歡
呼稱謝動至傾邑則是東國之厚也貴國之知有禮
也吾見箕封之遺教矣若夫建亭豎碑益非使者之
敢任也夫碑之設也志不忘也非其民也沐浴膏澤

誰克堪之使者輶軒所過歷閱而已周爰咨諏未遑
其能實有遠德以被茲土乎無德而歌舞之是滋耻
也甘棠畏壘必不其然矣若猶是所稱商賈之不携
也供應之從省也君知其爲無奇也焉用取此常事
而章耀之其又何以風示有位爲司牧勸也願足下
與當事者寢此盛舉小安愚衷且夫俗之日下也民
智而滋生矣太上忘情願與執事者其共圖之知生
姜曰廣拜

又

不佞奉 天子命來貴邦每患不稱任使卽嚴禁貨

約束僕從釐革津貼并儀節之辭讓亦罔敢不慎
猶恐不能仰體 天子之德意嘉惠遐方亦使者尋

常事耳昨自 王京至開城黃州平壤等處億兆百

姓舉手加額祝功頌德不佞面頰神搖匪所敢承乃

復聞構亭鐫石將垂不朽夫凡銘貞珉垂不朽者其

人必大功德于百姓斯可法可傳耳不佞一逆旅過

客懃懃懇懇求愜自心尚多遺憾乃以至細之行而

邀莫大之德雖羣臣百姓體 賢王好賢之雅惜不

佞非其人又何能自安耶惟門下轉啓 國王寢美

意于忘言還直道于遠古幸何可言感何可言知生

王夢尹拜

寄館伴李月沙書

孝恭有言陸賈皇華定知交於南越豈不以氣誼所
結天涯比隣哉足下東國望門詞壇名宿不佞雖迹
曠風雲然情延芝蕙比來獲奉披覲喜慰平生加以
盛德多情倦歎備篤至於臨別贈章愛重常懷言尋
悲切金石可銷此誼難泯矣所竊附者傾蓋之知所
長恨者交臂之失所謂伊人在水一方惟詠秦風終
焉永嘆前者卒卒有作不盡離懷政擬效隰桑之賦
少罄緇衣之誠而穆如佳詠颯颯遠來知情深難別

故自同之耳病中戀念不覺霍然陳琳之檄可愈頭
風杜甫之詩能驅瘧鬼豈不信哉展漢江遊圖又覺
蘭亭一會儼然未散凡此皆風流之豪舉千秋之美
談也風雅場中自得足下真不寂寞矣伏枕遂歌總
成藝語和咸池以下里酬明月以砒砒要益彰來教
之美耳昔張騫持節大宛得蒲萄而歸至今中原盛
傳其事不佞今得珠璣滿囊豈不爲勝之耶輶軒所
過歡呼塞道此自貴國尊重朝廷乃辱推引穠深祗
增慙慙實無遠德歌舞謂何不虞之譽有道不處足
下知我當不以斯言爲外飾也令郎道丈獲挹清光

意度宏深當復大受是父是子信爲不虛不佞蒲柳
衰質不耐劇病餘息奄奄僅自支護惠問遠尋益認
篤愛嗚呼月沙足下弘濟一別相見何期良時在茲
勛之而已外小律寄議政諸丈見意希轉致之知生
姜曰廣再拜

又

相晤未幾別緒忽驚心非木石能忘悵恨惟是王事
關情驪駒夙駕河橋一分遂成千古雖然聚散緣也
久暫數也緣不能限數不能局者情也向來日少而
情多亦願此後跡遠而情親耳語曰德不孤必有隣

安在同堂哉惟門下勉之江遊圖見寄知門下乃世之有心人勉作小記幸次諸名作于其上勿不多及知生王夢尹再拜

與伴送使書

日者以公事稠填濶疎大教歉乏盈懷適接清光差以爲慰耳珍貺垂存抑何太腆風義之厚真不替有加篤意謹一一心銘多儀仍藉手歸璧盖吾輩道義交情期以玄心相映均之不就儀物以明有恭也恩波亭記從病冗舍毫知不能揄揚盛美得毋令山靈笑人乎固陋之情統祈慈炤不一知生姜曰廣

又

人生忽忽四海悠悠夫合萬里以同風經半載而密
歷至於情存莫逆義篤久要斯豈偶然哉足下善氣
迎人親於兄弟僕平生雖孤僻爲之盡失矣弇州先
生有言吾行天下而知天下大也吾行天下而又知
天下小也作人如足下含章蘊粹體妙該玄真所謂
萬人亦見指不多屈者奉教以來每見觸事處宜如
秉青萍之器應機立斷拂鍾無聲至於有韻之言亦
復如書成誦且其陶鑄性靈組織風雅雕煙雲之氣
狀流日月之英華斯亦威鳳一羽足驗夫五德者也

夫以氣誼之深如彼好爵之懿如此顧倏焉而一別
竟相見以無期未免有情誰能竟翹睠茲秋水眷我
伊人杼軸之勞實盈懷抱矣天生賢才何國蔑有以
僕所覩記東國人文可稱彬蔚而自古及今聲名鮮
能著於上國宜亦志士之所甚惜也虜酋之難殆天
以不朽資足下乎三韓之有虜猶人之有腹心疾也
酋欲無厭除惡務盡東國夷吾舍子誰屬且子之
君則誠賢君也足下文承獨簡之契誠以此時輔翼
賢王亢厲威武滅虜而後朝食要使中原他日侈爲
盛事豈非古今希有之奇烈哉人生非麋鹿不能常

聚所貴風聞時欽便爲迹疎神通時不可失願足下
好爲之輜軒所歷未免費煩而貴國百姓反至歡呼
額謝流風之美且嘆且慙猶望足下轉奏 賢殿下
於凡所過量減田租薄示優恤此則 賢王格外之
仁也而非所敢必也萬里一呼所恃盛德通懷耳外
扇葛附致葛取其素質不渝扇取其胡塵可掃故以
爲贈臨書有懷言不盡意東望雲物時有泫然南州
姜曰廣

又

蛇浦握別去去難割黯然之懷意念深矣計與門下

往還二千餘里形影相依曾有一刻相離否睽別以
來永難再晤言念及斯何以爲懷門下溫文雅度卓
練雄才文章政事並稱高絕不佞幸遂識荆追蹤兩
月已足千古不佞惟藉此以自慰耳此情此誼願與
門下共之也通官回附言鳴謝臨楮悠然屢遙王夢
尹

回正使帖

大人膺命奉使頒慶下邦其所以宣布 聖天子
德意撫存敝服者寔東方二百年來耳目之所不
及清苦之操仁愛之德近者服遠者慕耄艾歡謳

載于道路思將捐髮膚之微報軫恤之恩顧無以
自効也則無寧樹一片石垂不朽名使百世有所
欽仰焉所謂志不忘者非耶不佞獲陪門館濡染
薰陶其所得於觀感者夫豈淺尠哉常懼不能讚
揚大德載之金石以負大君子知遇之私幸今兵
民趨事不謀而同能使峴山故事得復見於今日
輿情所孚不可沮格而大人歉然崇讓不自滿假
至辱札翰以教之不佞雖欲仰副大君子不居之
盛意將無以塞邦人之願而接於道也事非自擅
不敢承命惟大人恕亮不宣侍教生金湓頓首再

拜

回副使帖

頌德之舉實欲揄揚徽燄垂示不朽輿人之誦自
有不蘄然而然何敢有所溢美以誣天下之耳目
哉今者兩大人之莅下邦也省僕從嚴條約凡餼
具禮幣毫無染指宣布 聖天子德意色辭之間
隱恤如傷所至如和風時雨膏澤之人人深矣大
小臣民亡不飫德誦義歡忻感奮咸一口齊聲伐
石載名以寓去後之思亦人情之所不容已者也
大人有而不居撝挹太過謙謙之德形諸文字益

見大君子清操盛德比諸古人而有光書之簡策
而無愧矣不佞承事下風充然有得親見千載美
事方胥慶之不暇其何敢沮公言而副盛意乎亦
惟大人諒之不宣侍教生金湓頓首再拜

正使前揭帖

不佞承乏儼价得附青雲榮耀極矣况此辱捐恩
波亭記文古而義深從此湖山賴以生色豈獨爲
傳家寶也但鋪張許與太過其實雖出於大君子
獎感之盛意不敢當不敢當至如餽贐禮也未必
塵浼清德而終始見卻辭旨峻截自知得罪於門

三集
下無所厝躬惟大人領此誠慤毋終遐棄幸甚幸甚
甚不宣侍教生金湜頓首再拜

副使前揭帖

不佞祇候境上承事門館僅數月矣唯弗克周旋
墜寡君成命是懼反辱惠音過用獎誨循躬隕越
曷堪當之不腆菲薄聊備贐儀誠意膚淺竟靳莞
領區區寸忱無路自達采增慊悚仙舟解纜只在
此日肅楮悵然言不罄意侍教生金湜頓首再拜
上使副使前追送漢江船遊圖揭帖
人生聚散固當付之常數而此別最難爲懷回思

弘濟橋邊便是千古河梁悵悵之情至今結在心
曲豈衰人易感而然歟傾都父老擁路攀呼可見
清芬之入人也深豈但陪從門館之人獨紆軫而
長思也別後溽暑敲煩不審途間體履珍順否仍
念漢江陪遊真一勝迹敢倩龍眠摸寫一幅仰備
清玩倘於燕閒時時一覽一尊談笑萬里不隔此
身長在春風座上也幸畱惠一語以資湖山則益
爲傳家榮耀之寶更感更感統希崇照馮緘主臣
肅楮不宣侍教生李廷龜頓首再拜

回正使帖

河橋別後悵然如失搖搖此心長逐行旌便回眷
辱長牋暨瓊什披讀爽然若苦海中甘露灑也敬
服敬服卽想仙槎將泛星漢咫尺垂天之翼九萬
下風從此尺鷃枋榆無路仰攀惟思手額萬里之
外佇聞中國相司馬耳紀行小稿只是沿途信筆
僖父俚語適足獻笑從者誤徹清覽乃蒙高文獎
借逾分湔劣何可當也藏之巾笥以爲鎮家之寶
耳江遊作圖只記勝迹父老口碑要贊盛德皆出
於攀慕詠嘆之至情亦兩大人過存之餘澤也暑
令方嚴恭祝對時珍護忽冗不盡懷臨楮悒悒侍

教生李廷龜頓首再拜

回副使帖

乍違清範結想爲勞驛使之還寵賜手教殷摯讀之忽覺沉疴去體不啻執熱者之濯清風也江圖記文字字瓊瑤不朽勝事令人侈傳千秋赤壁當復鬱鬱生氣他時指點宛然真游不散何由作夢中道士也正想嚴程已戒風帆將掛海波如錦千里一瞬從此仙凡永隔雲路渺然弱羽沉鱗無復再會之期思之惘然來帖迹遠情親之喻足見四海皆兄弟之厚誼惟當銘之心曲永以爲好耳潸

暑正苦恭祝道體清
必臨書神往肅楮不宣
侍教
生李廷龜頓首再拜

皇華集卷之四十八編目

崇禎六年癸酉奉安島衆聯屬國勅使一

副總兵程龍

接伴使兵曹叅判辛啓榮

三
集
ノ

序

昔趙孟聘於鄭請鄭之七子者皆賦以觀其志且以徵其善惡存亡不爽左史氏傳載其美以爲善於使事而嫻於觀詩者不佞嘗怪夫晉大國也用詩書擇帥孟於三百之業非不彬彬素習而乃徒請賦於小邦之卿士而無所自賦以見大國之盛抑何寥寥也今總兵程公選於天子之庭忼慷張膽冒重險如涉夷庚自處賓館以來其所擘畫規爲動合機宜真足以立功立事毋負大司馬推轂委重之勤而又其廉白潔修冰蘖自勵大有許

海嶽風致小邦搢紳之徒旣慕其清規懿範舉皆有隰桑卒章之感而念無以自效則各爲歌詩輯成大卷以信莫助之愛焉於是公乃出其途次所得吟詠詩章總如千篇以示之水陸行役之殷山川謠俗之殊形容臚列指掌瞭眼而至於持危定傾拯濟塗炭之慮隱然於辭旨又非嘯詠風月者比殷勤詩人之風哉夫以東人之賦無所待請於公而公之所自賦如是其盛歟則古今人同不同未可遽論也公妙年投筆誠有封狼居胥意破浪東來擊楫成誓烈烈丈夫之雄及見雍容樽俎馳

驟韻語又何眷眷大雅也乃知奉公憂國雅歌投
壺初未嘗有二致耳不佞因是而有所感焉公之
職不以聯屬國爲任乎屬國之於中朝其分則
天經而地緯也其恩則生歿而肉骨也君臣上下
日夜之所講明心肝之所銘鏤戴天履土質鬼神
而無愧仰闔乾象衆星拱北俯瞻地紀萬流必東
區區一念有如是者倘賴公不棄疎逖采周詩翰
屏之義咨詢原隰以爲使歸之獻毋使駟駟泮閼
之辭獨擅天子之寵命則若公真可謂善於使
事而嫻於觀詩者不佞竊從楹廡望見公威儀又

采之盛實有覲德之慕敢以一言叙之崇禎甲戌
歲二月上浣朝鮮國通政大夫承政院都承旨知
製教兼書筵叅贊官春秋館修撰官藝文館直提
學尚瑞院正李敏求頓首再拜具

皇華集卷之四十八

海次阻風有懷

程龍

奉命安聯備一員
抒忠仗策涉長川
唯資神庇風帆順
何必舟人苦喚天
島衆蒙恩出水火
屬邦効悃頌綸宣
虜銷叛滅波濤靜
鞏固皇圖億萬年

次韻

黃海道巡察使吳

翮

詩書事業早超員
舟楫奇功試巨川
共說麟名馳赤縣
却看忠信任蒼天
風生碣石龍旗動
日照扶桑鳳綵宣
莫遣榴衣歸意促
東民佇誦大平年

禮曹叅判尹昕

人間難得好官員誰似風流葛稚川
寒館題詩山雨夕孤城經臘漢南天
笑談足使三邊晏咨度能堪四國宣
飛舄帝鄉知有日東風花柳又新年
舟泊皮島一晝兩夜不得收口夜聞神語空中
有感

程龍

擊楫中流駕一舟乘風破浪未能收
波心萬丈如珠滾海面千層似鷁浮
咫尺天涯不易近俄時悔吝豈同儔
履危步坦非常遇聽得空虛神護庥

次韻

禮曹叅判趙希逸

穩泛龍驤萬斛舟片帆遙向海東收
英風颯爽威

聲動化日融和喜氣浮遼路屬平豺虎梗漢儀嘗
接鳳鸞儔曾聞愷悌神明效冒險隨時默廕庥

平壤過天兵墓有感

程龍

大將旌旗解倒懸兵疲力盡事倉然千骸萬骨埋黃
土觸目傷心不忍言

捐資托陪臣及平壤觀察使買糧五百石助島
衆

島衆聊生日不週荷戈枵腹勢堪憂自慚捐助無長
策義貸知君有遠籌

過蔥秀站

小景巍峩一翠屏珍珠玉溜碧波清白雲滿徑無人
掃古木蒼巖有鳥聲

次韻

兵曹叅判辛啓榮

螺鬟如畫作雲屏溪水平鋪玉鏡清使節襟期真
不讓海東千載寄賢聲

過猪灘卽事

程龍

匆匆行色路迢迢古木蒼叢山更高寂靜柴門車馬
驟猪灘深處泊魚舠

其二

橋橫綠水漫平堤耀日旌旗振鼓鼙麗庶趨迎歸大

化山雞乍起馬驚嘶

途次供設有懷

簡命膺承安與聯斤斤敢不自拘鈴三軍縱使從吾
令一日何啻費萬錢

謝國王贈劔

賢王武庫有干將傾盖相遺意慨慷感佩不辭千里
去床頭夜夜放毫光

贈張譯官

相聞中外不同音兩致慇懃藉爾深羞澁囊空無可
贈唯祈賢王賚簪纓

謝 國王遺柚子

賢王欣分惠盤中多美馥黃金明色相白玉暗苞芬
遠香凝几席清標襲帷裾時瞻雲樹隔何以慰離分

謝 國王贈馬

五花騏驎不尋常白玉雙翻泥錦章環眼驚人光射
斗昂頭超衆氣騰驤臨風猛聽如龍吼舉步遙看似
鳳翔淨掃煙塵藉此力 賢王高誼誓中藏

癸酉仲冬二十有四日予安聯事竣蒙 國王
以時值冰沍海渡維艱雅誼欸畱予從其請求
假於僻靜山居可耳是以遷移於廣州山城待

春融凍解起節時趣裝東向值雪霽日中有伴
使工曹判書羣山具君以寶刀見遺及入手而
初出匣時毫光燦目輝耀驚筵近視之則如秋
水明鏡毫髮皆徹不忍釋手佩於腰間及三出
而三入匣內錚錚之聲不絕於耳誠哉真干將
莫邪也有從員曰寶劒贈烈士吾故曰具君之
意不在寶劒贈烈士以此刀今日之得售主人
耳撫掌大笑所從員役無不欣然予奉安聯之
差陡發請纓之志倘他日大雪前仇痛飲黃龍
府當與具君共之矣俚言偶就聊以申謝并祈

郢正

解佩相遺意氣深慇懃藉此靖胡塵封侯自是男兒業成事由天筭在人

次韻

工曹判書具宏

寶箠題詩眷寵深指揮願得掃風塵吳鉤三尺從公去佇見雲臺畫裏人

遷移廣州國王遣翰林崔學士勤問予畱飲於禪院時同伴使辛仙石三人同飲情投意洽予不覺有酩酊之狀致起擊筑之悲有感而吟

程龍

酣歌擊筑記當年潤論高談驚四筵更得伴臣情意
篤爲因王事謾言旋

次韻

辛啓榮

愧殺龍鍾屬暮年幾回油幕忝珠筵
王程有限知難挽其奈春風玉節旋

贈崔學士

程龍

文學翩翩美少年神清氣爽炫華筵謹承
王命趨勤問月下奔馳擲果旋

次韻

承文院正字崔文湜

旣忘尊貴又忘年倒意慇懃接寶筵
一襲春風如

挾纊豈嫌江路夜深旋

會晤沈郎中志喜

程龍

知君學業貫天人東國驚傳播海濱白雪一篇祈我
贈好將佳句久書紳

次韻

吏曹正郎沈東龜

家世山西第一人百年書劒海東濱當筵落筆風
雷句他日王庭詫縉紳

辛啓榮

龍虎雄韜敵萬人青冥斧鉞海東濱春風彩鷁西
歸日貞石勲名動縉紳

贈辛陪臣

程龍

賢哉伴使日爲勞
昕夕慇懃雅更高
滿腹珠璣遐邇通
重一腔忠義始終操
聞言王命心圖報
誼切軍情績可褒
總自好君明且德
喜看濟濟出英豪

次韻

辛啓榮

平生許國任賢勞
文武材全意氣高
豹略虎韜恢壯志
玉壺寒露凜清操
承綸紫極紆天眷
按節青丘佇袞褒
榆塞妖氛從此靖
安危須仗出羣豪

崔文湜

萬里星槎不憚勞
龍泉氣射海雲高
牙樯好與長

風便彩華爭看大手操自幸拜塵紆禮數還慚題
簋荷榮褒從前景仰河南學得觀來仍第一豪

沈東龜

虛館逢迎揖讓勞將軍標格雪山高纔從南漢擎
鸞馭能使東人識鳳操玉節已宣棠芾惠天書
應被袞華褒醉來橫槩長扛筆看取詩箋字字豪

謝贈梅花

程龍

老龍爲骨玉爲神月映梢枝不染塵多少皇華節使
客天香獨占幾經人

其二

夢裏尋香未見香今朝獲得老梅梁夜來欲覓春消息及整歸鞭花更芳

梅梁出自浙西會稽禹王廟有梅樹作梁每遇風雨上有水藻

忽一日風雨大作梅梁化為龍而去不知所之

次韻

辛啓榮

香魂也是玉妃神雪態冰姿洞絕塵一別西湖知已少山牕作伴未歸人

寒葩未吐臘前香移得龍根自大梁老幹莫嫌花意嫩笑他桃李媚春芳

得梅遇雪

程龍

覓得天香凍未開六花何處忽飛來春王欲透真消

息故遣梅枝帶雪催

次韻

辛啓榮

莫恨寒梅嫩不開
玉花飄散自天來
也知造化多機意
香信居然暗裏催

次辛接伴韻

程龍

覓僻尋幽壑
惟聞鐘磬催
須知春信早
先探隴頭梅
說劍胸懷壯
悲歌索酒杯
伴臣情興爽
對我共徘徊

原韻

辛啓榮

雪色連丘壑
孤城暮景催
村煙生古峽
春信着寒梅
遣興探清句
排愁把酒杯
官齋正寥落
終日獨

徘徊

出城卽事

程龍

古木山城戍寒鴉煙樹迷老僧供佛火村婦慰兒啼
客署年爲夜清齋日易西盤中珍味盛何忍庶脂割

次韻

辛啓榮

古郭風威緊禪扉雪欲迷帷寒眠衲凍林亂宿鳥
啼壯志關山北歸程大海西村殘兼市遠深愧供
刀割

謝具工曹梅花

程龍

司空有饋遠相頒獨秀孤根趣自閒玉骨冰肌天上

種爲探春信到人間

客署無聊登漢興寺卽事

信步登山去巍峩古刹中老僧驚落帽稚子慢呼童
壁陡苔尤冷峰高樹不叢遙看一回首使我息雄風

次韻

辛啓榮

浩蕩尋真興輕裾落照中山深雲滿履路細鶴隨
童古寺疎鐘響懸崖老桂叢飄然如羽化兩腋挾
天風

遊漢興寺贈山僧雪峰

程龍

東國繇來教一宗如何滅得梵宮鐘當年曾說天花

墜始信於今有雪峰

次韻

辛啓榮

文章驚世是談宗落拓襟期爽氣鐘
蠟屐飄然詩興動彩毫揮處是孤峰

景仰高標若岱宗敢將瓦釜效黃鐘
長扛筆下驚人句月滿秋空雪滿峰

時有少僧戒淨持卷向予索句見其卷中多名
筆但此僧竟日下山求索而已矣其間亦有謔
語予詰之曰何以爲之戒淨也亦次卷中韻書
以贈之

程龍

戒淨須當戒出山携囊索句往來間肝腸未淨心猶
火那得浮生半日閒

復用前韻贈戒淨

戒淨見詩俯首而叩曰僧不願出山而願守
淨耶又復索不已予復韻以贈之謂之曰能
戒則予後詩未戒則授前詩戒淨當自思之
非淨之不戒乃戒之未淨也禪機玄妙法流
淨土戒淨能悟之乎

興來今日便登山良晤山水間坐聽松風無俗
慮雲堂鍾鼓事清閒

次韻

辛啓榮

身都是膽氣如山世許關張伯仲間
掃蕩腥膻知有日天生豪傑未容閒

歲暮孤城雪滿山夜深寒月透牕間
禪扉寥落鍾聲斷燒盡清香意自閒

漢興寺有十二歲書童李叢以詩呈予就韻以贈之

程龍

東藩異國有奇蹤十二書童筆似峰
攀折廣寒馨不遠功名拾芥粟千鍾

登山車馬趨迎偶成

登山何驅車馬玩景不別王翁舉目晴峰返照歸來
明月清風

次韻

辛啓榮

青霞裾綠玉杖左釋子右仙翁何處花宮淨散冷
然滿袖天風

前者出示沿途諸作新奇雅麗有若隨珠吐
淚藍玉生煙莊誦再三不覺腸肚頓醒洗却
五辛渣滓其何幸如之今未敢一一攀和就
其中近體二首仰步高韻以答盛教詩云乎
哉達情而已

尹昕

名將威風比伍員詩家句格邁臨川從知文武俱
成業更覺才能出自天夷險早輸忠節著安聯今
任玉音宣鰕生正值回春慶榮幸難忘得御年

涉海嚴程不計勞使華忠義逼天高分明軍令杯
頻舉收拾風光筆屢操東島恩資蒙盛濟箕城毅
魄入新褒平虜滅叛無難事始信天朝第一豪
九重東顧聖心勞才力如公簡選高驕虜聞名行
自戢羸俘趨化不須操島營不盡投醪喜屬國多
蒙贈袞褒王事告完今返旆臨關意氣自成豪
酌贈禮曹尹接伴使程龍

東藩名士拔羣員巨業弘猷振洛川駐節欣逢冬至
月起旌分袂艷陽天自慚才力難賡和持贈詞源不
倦宣使我臨風歌綠竹兼隆爵德更多年

駐節廣州山城開元寺永漏無眠有感

松覆雲堂夜更清呼童燒燭取茶烹窻臨皓月光如
晝劒吐青虹事未平慷慨難逢捐報願攬搶猶熾實
堪惇如年永漏天微曉蝴蝶莊周夢不成

次韻

辛啓榮

夜靜禪齋霜雪清懸燈催着玉龍烹庭生金鎖心
猶壯匣老秋蓮氣不平幾閱詩篇散寂寞強斟官

酒慰孤惻疎才自幸叨榮遇肯惜珠璣咳唾成

具宏

榆關氛祲幾時清遼海鯨鰲未就烹天子至今

勤肝旻下邦何路答昇平橫行上策淹防戍飛輓

連年困寡惻遙想佛幢殘燭夜憧憧百慮算虧成

懷筍

程龍

凌空虛植碧蒼株弄月吟風未許孤淚滴凍根曾感
發不知此地有和無

次韻

辛啓榮

蕭疎碧玉歲寒株靜對晴窗德不孤海域卽今新

孝理感抽霜笋未應無

具宏

煙雨江南萬玉株別來騷興頓成孤遙知臘雪圍
初筍會得平安信息無

山僧道俊携卷索句次韻

程龍

舊憤新愁積痾夜來幽夢到嵎峩山僧携卷求詩
句俛首沉吟無一哦

次韻

辛啓榮

梅窻逸興撥微痾晚拂輕裾上業峩大野長江渾
入望盡輸清景付吟哦

同辛陪臣登臺之作

程龍

欣逢此地有高臺今日登臨亦壯哉萬疊屏山從地
起來溪源路自天來遙瞻北極宸光遶近對南山王
氣培一片荒城迷積雪恢諧四顧眼中開

次韻

辛啓榮

城上危峰峰上臺登臨擡眼意悠哉泰山鳳舞連
雲起漢水龍蟠抱野來萬里微誠天北拱千秋佳
氣海東培飛廉亦解遊人興吹掃煙霞落照開

同辛陪臣續遊國清寺山僧性脩以卷索句次

韻

程龍

登臨未已已終朝渴飲祇園湯沸椒坐對高賢詩興
勃滿山晴日雪融消

次韻

辛啓榮

花宮寒磬報清朝客裏年光近頌椒新臍欲闌梅
漸吐滿山晴雪未全消

國清寺酒酣卧石

程龍

別是人間一洞天酒酣詩就石頭眠緡蠻黃鳥窺人
意半日清閒半日僊

次韻

辛啓榮

花宮縹緲近諸天沙界無塵獨鶴眠回首雲山如

隔世飄然直欲挾飛僊

國清寺觀佛戲說

程龍

擊鼓嚮雲鑼和尚弄風魔世人休笑我場中傀儡多

次韻

辛啓榮

老衲擊鈔鑼爲供菩薩魔虛無吾不取夫已道乎多

晴窗賞梅

程龍

玉梅初綻曉窗晴精舍蕭然幽更清可惜新醅成晚熟龍團雪水煮銀鎗

次韻

辛啓榮

日上梅窗媚晚晴篆香燒盡有餘清呼童催煮小
團月颯颯招聲生石鎗

謝問欣逢贈柳學士

程龍

遣官頻問禮多周朝夕慙慙愧久畱冰沍未消難駕
渡春融將解借槎浮久知花筆驚人語近覩芝眉散
我愁醉飲醇醪忘日墜青雲慶會果風流

次韻

弘文館校理柳穎

大人才氣盛殷周蕭寺相逢蹔滯畱已識深情三
竿勸旋瞻黃色兩眉浮漫山暮雪偏多興散野頑
雲更惹愁忽把瓊琚揩病眼總戎當日是詩流

辛啓榮

堂堂志氣慕伊周肯數封侯萬戶畱驥足早從雲
路騁仙槎遙指海天浮孤城畫角三更月虛館青
燈一枕愁大漠腥膻猶未掃東風擊楫誓中流

釀熟梅開小賞

程龍

臘醅初熟正梅芳贏得梅花噴鼻香酒興欲闌花更
襲龍團雀舌試新湯

次韻

辛啓榮

仙葩映雪吐幽芳絕勝風蘭舞國香况復燒春酒
已熟不須除祓飲桃湯

清夜聞梅

程龍

廣寒深處透天香
引入祇園伴客床
夜靜花凝霜雪
冷一灣殘月遶回廊

次韻

辛啓榮

深宵銷盡鴨爐香
半壁孤燈書滿床
多謝寒蟾別
有意爲畱清影轉西廊

駐節廣州山城率屬朝賀

聖誕

程龍

曙色將開雞唱頻
安聯島域慶同春
八荒野老朝南
極四海藩王拱北宸
銀燭輝煌山月小
玉爐縹緲篆煙勻
微臣鱗集三呼舞
萬壽無疆祝聖仁

次韻

辛啓榮

曉闢金門漏箭頻，禁城和氣藹陽春。
九霄瑞旭臨丹闕，三島祥雲遶紫宸。
玉帛輸誠千里遠，崗陵祝壽萬邦勻。
海藩倍切瞻天恟，沐乾坤覆載仁。

次辛陪臣韻

程龍

紅日中天消雪霜，山城拱衛任風狂。
籌邊不覺隆冬冷，經國偏宜午夜長。
聖德光明被四表，天樞泰運轉三陽。
安聯命畢無餘事，擊楫乘流歸帝鄉。

原韻

辛啓榮

臘後窮陰釀雪霜，黑風掀屋勢顛狂。
重衾不暖知

皇華集
寒緊孤枕無眠覺夜長多緒新愁催白髮有期流
序逼青陽可憐一片思歸夢謾逐春鴻到故鄉

同辛陪臣賞梅

程龍

寒梅疎淡散清香兩意相投滋味長我興未闌君飲
細續燒紅燭映霞觴

次韻

辛啓榮

辛叨蘭室襲餘香快覩騷壇光焰長更荷將軍珍
重意雪梅花下共啣觴

獨酌偶成

程龍

擎杯緘默有深思思盡杯空無一詞萬事不如杯在

手何須思索更爲奇

次韻

辛啓榮

語默雖殊各有思
醉來乘興寫新詞
胸中素蓄平戎略
玉帳行看出六奇

除夜山城禪院集屬暢飲偶成

程龍

鑼鼓聲喧送舊年
鄉人儺句出書篇
興來不覺渾無我
酒後那知更有天
天子曾經容醉客
將軍何不學逃禪
今宵除夕難排遣
法外姑從不執權

次韻

辛啓榮

守夜嚼杯惜瘦年
放歌豪興入新篇
孤忠耿耿葵

傾日壯志磊磊劒倚天誓奮金戈探虎穴行看鐵
杖散狐禪九重注意無雙士手握青油上將權

除夜無眠坐守待朝

程龍

除夜無眠再把杯愁腸消去酒腸開香煙裊裊風生
篆銀燭輝輝花影臺斗柄平分明曙色天雞初唱曉
頻來漏聲滴盡鐘聲振朝賀恭趨遍九垓

次韻

辛啓榮

惜夜何嫌復一杯羈愁消盡笑談閑五更殘漏新
春序千里歸心舊釣臺畫角聲催孤睡散寒梅花
送暗香來從知玉節歸期近麟閣高名動八垓

弘文館修撰李時楷

寒宵殘燭映深杯
暝靄蔥蘢曙色開
星斗夜闌低
玉節鼓鍾聲徹出
香臺仙槎漲海歸
何日遠客孤
城歲又來雲物自將春序至
大平猶喜漸東垓

吏曹正郎具鳳瑞

花明篆燭酒盈杯
始覺窮陰逐歲開
良夜勝筵傳
玉漏異鄉歸夢向瑤臺
椒盤佳頌迎春動
梅砌輕香冒雪來
天上彩儀今幸覩
新年喜氣滿東垓

甲戌元日駐節廣州山城率衆朝賀 聖節

程龍

皇朝集
中屬衣冠拜紫宸御爐香襲絳袍均山呼頂頌關河
輦景仰恩波雨露新萬里祥雲捧旭日九重春色靜
煙塵今朝共樂昇平晝此月明年又建寅

次韻

辛啓榮

拜舞昕庭望北宸呼三歲萬慶歡均煙晴官柳春
光淡日射扶桑瑞色新已覺乾坤布淑氣會看關
塞靜妖塵欣逢千載河清運歌頌洋洋動八寅

具鳳瑞

萬國星環拱北宸帝光東漸海隅均燕雲佇拓
提封舊鳳闕遙歡節序新黃道昭回瞻舜日黑山

蕭瑟靜胡塵車書一軌知無外元月同行夏正寅

沈東龜

一朶紅雲想玉宸樽開白獸聖恩均天涯賀禮
重溟阻雪後春光萬里新詞客清篇騰善頌將軍
寶劒靖邊塵閱序他鄉多感意今看北斗又回寅

元朝山城卽事

程龍

家家戶戶禮新禧野老村嫗慶唱隨胼胝暫停因節
屈醅醕終日醉醇醑

次韻

辛啓榮

新年村俗賀新禧白叟黃童兩兩隨但願時平歲

三集
亦熟只要常醉不嫌醺

元朝次日同兵曹接伴使辛仙石廣州牧使李
笑醒掃雪烹茶開樽暢飲州牧有悚然未暢之
意予詢之何故答曰牧使官卑對天使大人不
勝惶恐而又兵曹在座也予方覺之叙中即于
書於接伴使書曰仙石兵曹也笑醒牧使也雖
有節制之分然值元朝節屆又兼中外雄豪會
叙此亦奇邁予除夕拙句云天子曾經容醉客
之語何必拘拘於是乎俚言偶就併教

程 龍

雪水松蘿七碗烹葡萄浮綠會羣英須知廉蘭俱成
志舌劒橫戈定大平

次韻

辛啓榮

掣海長鯨未就烹天教勲業屬豪英腐儒雖老心
猶壯半夜秋蓮氣不平

甲戌元朝後五日山城大雪本州牧使李笑醒
設宴開樽邀予及伴使辛仙石共賞主人之情
甚是慇懃初飲卽以巨觴投予盞有護衣磁碟
內有詩篇初見以爲寫就求飲之意及再目之
乃審煉也予就韻以次之笑醒悅甚是夜賓主

酣飲大暢

程龍

迎春飄瑞雪團月煮銀瓶有酒須當醉無辜李笑醒

原韻

磁磔

墅杏初成雪松醪正滿瓶莫辭今日醉長恨古人醒

次韻

辛啓榮

爲賞新春雪青絲繫玉瓶厭厭此夜飲願醉不要醒

新春偶成

程龍

桃杏含葩柳吐煙雪消浸潤草根芊高峰萬疊苔猶

冷巨海千層波漸漣黃道天開人廣吉青陽地轉物
妍鮮喜逢春日宜春酒淡淡春山春水連

次韻

辛啓榮

晴日輕風滾濕煙小塘芳草欲芊芊雲岑當戶分
寒影雪水添溪動碧漣粉瘁梅腮香乍歇青歸柳
眼色初鮮居然景物撩詩興律格清高邁惠連

次戒敏卷中韻

程龍

中外雖分地春秋共一時聖賢道在邇佛祖法無遺
對景當畱賦逢僧亦贈詩山中悠樂事新柳有鳴鸝
題贈故僧靜菴卷

皇華集
孤鶴眠松頂寒禪月映門形枯心不朽氣息性猶存
大道歸無極高名動 至尊千秋如頃刻依舊在乾
坤

次趙禮曹謝畫蘭竹韻

竹蘭資茂有其時更美馨清德可期二種并稱君子
質凌霜傲雪凜冰姿

原韻

趙希逸

蘭竹一紙堪爲絕世之寶當十襲巾衍擬
作傳後珍玩茲敢口占一絕以謝盛意云
爾

春蘭霜竹不同時紙上移來似有期應恨國香秋
後歇芳心共保歲寒姿

次趙禮曹元宵韻

程龍

山城鼓樂鬧良宵燈燭輝煌徹透霄中外欣逢十載
事光搖不夜任逍遙

原韻

趙希逸

春王正月上元宵金魄揚輝滿九霄令節觀燈京
輦事暫時忘却海東遙

次韻

辛啓榮

銀燈千點媚清宵燦若明星列九霄令節歡娛同

去歲片時忘却故園遙

贈原任水部黃郎中

程龍

胸富三湘博五經黃鍾原屬廟堂靈青萍出匣毫光
閃暫返東山望更馨

次韻

原任水部郎中林川守黃一皓

將軍早已涉麟經筆下長風掣巨靈試向人間傳
綺語天葩滿眼散芳馨

雪鏑橫腰百戰經河魁射彩動圓靈陰山蹴破單
于窟麟閣名應萬古馨

和黃水部復用前韻謝寄蘭帖

程龍

囊錐穎脫已曾經廊廟鼓鍾當又靈韞匱藏諸應炫
世從來韓范不凡馨

其二

素愛蘭芬工畫經多年不染筆端靈爲因巖穴藏琦
玖紙上移來風送馨

原韻

黃一皓

繪事誰知妙意經儘教真趣自通靈清風恍襲芳
蘭息贏得玄芝晚節馨

嫩色還疑細雨經天機奪得化工靈驛南昨夜梅
花發爭似幽蘭滿室馨

欣逢具郎中志喜

程龍

灌耳如雷心已盟相逢一顧果靈鑛但畱佳句驚人
筆傳至中朝識姓名

次韻

具鳳瑞

文武壇中已主盟政如東序置金鑛叨陪門館真
非分慣識河南舊姓名

次具郎中謝寄蘭竹畫韻

程龍

綠竹蕭蕭笋發春幽蘭馥馥谷生句清香占盡羣芳
味鑑賞堪爲一段珍

原韻

具鳳瑞

郁郁芳蘭谷口春一叢綿竹綠初勻將軍絕代丹
青跡歸作縹緗永世珍

贈儀賓申都尉

程龍

美君攀附竊天香瓊葉瑤枝迥不常三峽才華高北
斗一腔忠義佐朝堂無繇會晤知荆面去後逢人說
項腸咫尺神交勝萬里婉如蘭蕙共芬芳

次韻

東陽尉申翊聖

每誦將軍姓字香平戎勲業著旂常通神墨妙超
蹊逕餘事文章入室堂二絕猶堪傳勝蹟孤忠况
是負剛腸塵踪自與仙標隔卷裏空尋九畹芳

山僧德一携卷索句次韻

程龍

異國空門別樣裝胡僧驚見世無多春光明媚搜清
韻美爾幽閒我若何

次山僧斗暹卷中韻

向來素志愛泉林爲國經籌未遂心
檠戟言旋春乍日卷開幽谷贈蘭吟

別雙梅精舍

朝夕相依已六旬香清几淨絕風塵
雙梅精舍仍如故空負晴窗慶賞人

次韻

辛啓榮

駐節禪房經幾旬無端此日動行塵只應南漢山城月分照秦京萬里人

駐節山城久聆教益起旌別贈辛伴使

程龍

春融凍解動旌旂衣袂蘭馨德不違三益規箴成友誼六韜談論洩兵機晴峰曉日堪吟韻赤幟紅纓促馬駢羊角風生帆掛影桃花浪逐棹如飛

次韻

辛啓榮

西塞逢迎錦帳旂忝陪南郭興相違清標雅望山河氣大筆雄詞造化機梅榻幾回聯醉袂驛程將

三
集
卷之
奈送征駢離懷何處堪愁劇月滿春天旅鴈飛

別李牧使

程龍

廣州牧使勇而良氣吐霓虹度自洋斗酒不辭追李
白丹心一點固邊疆

贈牧使小兒郎國器

未紀小儲材儀容動憲臺燕山曾有訓可畏後生哉

別贈詩僧雪峰

佛教更兼儒教宗萬僧羣內起孤峰禪門冷落軍門
肅天海相違豈易逢

時出登臺和尚義清携笺索求詩畫勒馬懸筆

口占一韻并賜蘭花一幅不負其誠懇之至也
不禮梁皇共法華何曾披掛那袈裟登臺勒馬求詩
畫姑贈三葉兩朶花

時伴使辛仙石牧使李笑醒相邀登南臺暢飲
席上卽事

晴峰朗日復登臺起節雄風撲面來遙望倭氛滄久
靖近觀虜氣運當灰鼎烹鯽鯉供吾箸樽罄醇醪暢
衆杯仙石瑚璉華美噐笑醒自是北平才

次韻

辛啓榮

晚隨飈馭上高臺入野長江眼底來遠岫騫騰鸞

鳳翼晴雲舒卷豆楷灰慙慙雅意畱詩句珍重深情付酒杯醉興無端成別恨陽春欲和愧非才

智文索句次韻

程龍

山寺山僧山上來德容道骨不凡才石巖對面形畱壁楊柳枝頭水滿杯說法曇花開世界寫經貝葉倚雲隈駢駢馬忙中駕寄語支公慢自裁

嶺南山僧文洽索句

春風拂拂動旌旂無暇雄吟彩筆揮又見嶺南禪院客贈言權自當珠璣

嶺南山僧大成苦索詩畫

征輅將駕出峻嶒詩句多畱贈好僧他日嶺南舒卷
看幽蘭馥郁謾誇稱

贈碧雲上人詩畫

南漢山城僧碧雲慇懃訪道廣知聞折蘆江渡逢相
識漫說清幽花自芬

贈印贊山僧

年少披緇心意堅焚修當自步前賢蒲團打破超生
死百尺竿頭更勉旃

謝王僧真一

駐節禪林信有緣松風颯颯鶴孤眠爲貪鍾磬忘塵

皇華集卷之六
慮贏得清閒兩月仙

山僧自瓊索句韻賦

山城高阜洞門開引得春光先透來
遠近巍峩七寶刹菩提玉樹倚雲裁

贈山僧法明

終朝僧衆瞻天句豈是龍蛇筆下傳
學劒學書俱未就欲吟白雪不成篇

贈山僧玉敏

遠公何自獨來遲意盡思窮無可詩
法墨臨池書楷跡山城一記永堪碑

贈上俊上人

一言會晤道心專
叅透機關禮佛禪
功業圓時超世界
今生端的了前緣

贈山僧稔秀

雙梅精舍僧如許
兩兩三三成伴侶
退後趨前不解音
無非只欲沐天語

贈山僧卓靈

春風送節鼓聲輦
駟馬駢駢不住蹄
碾墨捧箋揮彩筆
千秋寓目把名題

起節別山僧雪峰三印

遠別志公歸 帝鄉叮嚀再囑護梅房天旌許久羈
禪院半屬皇華半法堂

山僧處文勒馬求句口占以贈

春風玉節凱歌旋無限山僧索錦篇毫兔處囊難脫
頽停驂口占畢安聯

贈王僧三印

駐旌何自覓禪林爲愛高山白雪吟晚鼓晨鍾人易
老一輪明月照丹心

起節途中遇雪

征鞍慢跨馬如飛僧俗抒誠意不違日暗風輕飄玉

屑雪梅爭送彩旌旂

其二

久羈禪室去心飛
天海昇沉自此違
想是塵氛應雪
靜春風朗日耀龍旂

其三

風雪飄飄旅鴈飛
來時相洽去時違
東藩忠義承恩
寵春色先歸漢將旂

次韻

尹旸

山城春返見鴻飛
西笑幽期定不違
自是甘棠餘
思在都人長望渡江旂

三集
隔江空費夢魂飛堪恨音塵數月違此日重逢天
使館雪中欣覩舊旌旂
龍沙西望塞塵飛惟幸安聯計莫違告諭旣成巴
蜀檄精忠昭揭岳王旂

戶曹叅判南以恭

仙馭飄然望若飛滿城鬢白惜離違東風故作江
郊雪淨盡征途又點旂

浮海棲山急景飛使華行色動無違從今天地氛
昏豁瑞雪先霑錦帳旂

一別山房夢獨飛春來何處又相違平生瓊樹無

因接頭白天東望繡旂

成均館司藝許 啓

玉節春回逸興飛青眸容接禮無違東君更惜年
光早故放天花撲彩旂

袞衣東出渚鴻飛加額都人更惜違鶴野何時妖
褻豁大平重建漢旌旂

青海頻年檄屢飛西風看劒壯心違春來誓刻燕
然石手斬樓蘭擊大旂

漢興寺僧處仁往南別宮索韻

程 龍

求詩失卷已無緣南別宮中苦索篇佛在心頭何必

皇華集
問傳言僧衆好叅禪

題畫蘭草

幽蘭美質本天奇
陡壁深崖霜雪宜
更佩清馨君子德
霞箋漫寫馥花披

題寫蘭蕙

蘭蕙同馨不共時
幽蘭先馥蕙隨之
德稱君子美人質
據占羣芳第一枝

南別宮中山僧戒珠携卷索韻

起節榮旋日空門
向索詩捷書頻報
帝卜易吉貞師次
韻因僧面揮蘭供
佛姿皇華千古蹟
舒卷可

忘饑

次尹禮曹謝贈蘭韻

匆匆行色促歸期
兩意相投豈忍離
衣袂久馨蘭臭
味東藩名士善人貽

原韻

尹昕

平生奇遇執如期
累月團圓忽此離
惟賴詩蘭題
滿紙清芬真是美人貽

還旌志謝 國王

程龍

賢哉高義慕淳風
吐握優隆事事恭
感戴未酬原有
待肯隨鞭鐙奏膚功

其二

自愧才疎力不勝馳驅報國誓堅貞知君已切同仇
義滅盡攬搶建大平

志謝捐助遠輸

美君慷慨力周旋易送七千忠義堅牛馬運駝疲驛
遞遠輸端爲畢安聯

志謝文武諸縉紳

貴國衣冠拜縉紳詩書禮樂世相因虛延曲就非長
策共掃腥膻拱北辰

次韻

許啓

十年欣覩漢冠紳一識荊州亦舊因
屬國丹心昭日月莫言山海隔楓宸

次尹禮曹韻

程龍

萬里江山一顧中
艤艫破浪駕長風
三冬凍冽音沉渺
新歲融和信可通
氛孽漸消稀號令
海防嚴密置郵筒
忘年一別難期晤
尺素憑傳託鴈鴻

原韻

尹昕

陪侍清塵日月於茲薰陶未洽別期遽迫
天上人間從此訣矣離懷萬緒聊構一言
非敢爲詩情則在是

三集
匝月追隨一館中時於座上挹春風團圓縱久心
逾敬言語雖殊意則通山雨夜燈移酒席開元晴
雪遞詩筒飈輪此日還千里離思難堪作鴈鴻

次尹禮曹送別韻

程龍

爲餌鯨鯢涉大洋膺承簡命渡仙鄉值陪門館心相
洽倏別華郵意未茫獨任安聯追定遠兩難伯仲美
元方清塵自誓紆東顧目擊民瘼視若傷

原韻

尹昕

流澌二月報開洋萬里山河杳帝鄉溟浸已兼
胡祲豁將星仍並使星芒便宜奏牘歸仙陛指顧

威靈振鬼方賓幕久慙叨禮數袞衣西去只心傷

次尹叅判安聯百韻志別

程龍

烽火無聲景大平千秋德化不翻更文章著世承先
訓禮樂維邦舊有情指日殊恩頒鳳詔一時話別
建龍旌還朝俯奏東藩事豈負安聯司馬名

次許司藝百韻志別

海烽告熾聖憂衷綸命欽頒奏凱功島衆已堅蒙
盛濟東藩効順慕淳風兩回駐節叨陪值數首新詞
堪壯戎勉旃共襄平虜業願將忠義達宸聰

黃水部臨別愴然復步蘭帖韻兼謝畫松之寄

遂依韻和贈

蘭竹幽芳幾度經而今得伴紫芝之靈三奇並茂蒼松
覆滿遂天香共世馨

原韻

黃一皓

蒼髯獨秀雪霜經蓋盡林泉草木靈忽漫紫皇移
上苑可憐之竹若爲馨

贈別具工曹

程龍

國祚靈長賴世臣老成碩德足堪珍才能當道稱英
傑經濟於今舉大賓虜騎調停皆入彀逆謀融化盡
杼諄盤桓親愛相宜日分袂難爲在仲春

次許司藝韻

文武途分共一場君居故國我他鄉謾言登涉安聯
易相識山城歲月長夜夜客星光劒氣朝朝賓館帶
書香湯關未唱心先醉馬首相違別路茫

原韻

許啓

揆藻穿楊各擅場英才元士考亭鄉橫戈紫塞狼
煙熄弭節青丘鷁路長禪榻吟梅詩興足蠻箋礮
蕙墨花香微生幸遂登龍願一別雲泥便渺茫

夜飲次許司藝韻

此行天海隔東國好風光今夕難排遣明朝整別腸

其二

擎杯言別二更時
斗酒論心有所之
坐對羣英圖大計
恍如寶樹共瓊枝

原韻

許啓

別路千岑隔華筵
一日光春宵無限酒
難豁此離腸

把酒相看夜雨時
玉人明月欲何之
仙槎萬里雲泥遠
此別那堪折柳枝

又次許司藝謝蘭竹畫韻

程龍

中外欣逢共一時
何須者也矣乎之
從來武備兼文


事郵暇何難贈一枝

原韻

許啓

翰墨丹青冠一時携來蒲袖寶藏之最愛荷蘭九
畹葉更臨叢竹後凋枝

皇華集卷之四十八





華

西

三